




中國全華中  
名勝古蹟大觀



目次

第四編

河南

第五編

陝西

第六編

甘肅

第七編

江蘇

大陸圖書公司  
行 印

# 中華名勝古蹟目錄

## 第四編 河南

一 開封.....一—五

豐樂樓 蓬池 夷門 博浪沙亭 陳驕驛 三槐堂  
長嶽

二 鄭州.....五—六

繆子階 黃河鐵橋 太公亭 虹橋

三 歸德.....六—八

隱山 漆園 文雅臺 五老堂

四 陳州.....八—一〇

雕陵岡 東門池 厄臺 子由亭

五 許州.....一〇—一二

中華名勝古蹟 第四編 目錄



3 0477 7919 8

召陵岡 望嵩樓 尙書臺 德星亭

六 汝寧……………一二—一五

玲瓏洞 二龍鄉 相公園 平淮西碑

七 南陽……………一五—一七

蔓荊山 臥龍岡 菊洞 樊重石室

八 光州……………一七—一八

浮光山 橫溪山 石盤峯 玩花樓

九 河南……………一八—二三

北邙山 嵩高山 達摩洞 天津橋 雲臺 玉女臺 金 函 綠野堂

十 陝州……………二三—二五

熊耳山 函谷關 望氣亭 魏野草堂

十一 汝州……………二五—二七

洗耳河 太史湖 流杯池 修禊亭

十一 衛輝……………二七一—二九

礮溪 朝歌故城 青陵臺 嘯臺 七賢祠 畫舫齋

十二 懷慶……………二九—三二

太行山 孟津 盧仝別墅 聶政墓

十四 彰德……………三二—三四

韓陵山 隆慮山 三雀臺 姜里 浣衣里 畫錦堂 避暑宮 逍遙樓

---

中華名勝古蹟 第四編 目錄

# 中華名勝古蹟

## 第四編 河南

### 一 開封

開封北帶黃河。賈魯河、惠濟渠、斜貫之。川原平曠。水陸四通。汴洛鐵路東起於此。今廢府爲開封縣治。卽舊祥符縣也。城北距黃河十里。南薰門外有青城。宋降於金。金降於蒙古。俱在此於。

### 豐樂樓

豐樂樓在開封縣城內。舊名樊樓。宋徽宗重建。改今名。劉子翬詩。梁國歌舞足風流。美酒如刀解斷愁。憶得承平多樂事。夜深燈火上樊樓。

### 蓬池

蓬池在尉氏縣東北一里許。卽春秋時之蓬澤。阮籍詩。徘徊蓬池上。回首望



大梁卽此。

夷門

夷門卽今開封縣城東門。魏有隱士侯嬴。年七十。家貧爲夷門監者。信陵君聞其賢。欲往請之。乃置酒大會賓客。坐定。公子從車中虛左。自迎侯生。生直上載車。不讓。公子執轡甚恭。侯生至。引之上坐。賓客皆驚。及秦圍趙。趙平原君夫人。信陵君之姊也。求援於公子。公子數請王。勅晉鄙救趙。趙王不聽。公子乃屬賓客約車騎百餘乘。欲赴門以死於趙。過見侯生。生曰。公子無他端。而欲入秦軍。如以肉投餓虎耳。何功之有。公子再拜問計。生曰。吾聞晉鄙兵符在王臥內。如姬最幸。力能竊之。且公子嘗爲報其父仇。姬嘗欲爲公子死。誠一開口。則得虎符。奪晉鄙軍。北救趙。西却秦。此五霸之功也。公子如其言。得兵符。侯生曰。將在外。君令有所不受。有如鄙疑而復請之。則事危矣。臣客朱亥力士可與俱。鄙不聽。使擊之。公子至鄴。晉鄙合符。果疑之。亥袖四十斤。

鐵鎚殺鄙。公子選兵而進。遂却秦存趙。大破秦軍於邯鄲。由是信陵君之名益震。

### 博浪沙亭

博浪沙亭在開封縣北。舊有博浪城。漢張良字子房。其先韓人也。秦滅韓。良悉以家財求客。刺秦王。爲韓報仇。得力士。狙擊始皇於博浪。誤中副車。

### 陳橋驛

陳橋驛在開封縣東北四十里。亦名陳橋鎮。宋太祖爲軍士擁立。黃袍加身。卽此處也。時太祖爲後周太尉。世宗崩。恭帝年幼卽位。會契丹入寇。命太祖率師北伐。軍次陳橋驛。夜五鼓。軍士集驛門。宣言策點檢爲天子。蓋太祖曾爲殿前點檢使也。及遲明。諸校露刃列於庭。曰。諸軍無主。願戴太尉爲天子。太祖未及對。有以黃衣加其身。衆皆羅拜。呼萬萬歲。

### 三槐堂

三槐堂在開封縣東門外。爲宋王祐故宅。嘗手植三槐於庭。曰：吾子孫必有爲三公者。後其子且舉進士。眞宗朝知樞密院。朝廷清明。天下無事。享其福祿榮名者十有八年。且子素。祐之孫也。居官直諫。仁宗御筆親除四諫官。素其一也。帝嘗曰：王素眞御史也。時彈劾權貴。聲稱凜然。人目爲獨擊鷓。出入侍從將帥。三十餘年。以工部尙書致仕。蘇軾作三槐堂銘曰：嗚呼休哉。魏公之業。與槐俱萌。封植之勤。必世乃成。旣相眞宗。四方砥平。歸視其家。槐蔭滿庭。吾儕小人。朝不及夕。相時射利。皇卹厥德。庶幾僥倖。不種而穫。不有君子。其何能國。王城之東。晉公所廬。鬱鬱三槐。惟德之符。嗚呼休哉。

### 朱仙鎮

朱仙鎮在開封縣西南四十五里。爲宋岳飛大敗金人處。飛自鄆城進軍朱仙鎮。與兀朮對壘而陣。遣騎五百直衝奮擊。大破之。兀朮遁還汴京。

### 艮嶽

艮嶽在開封縣城內東北隅。初名鳳凰山。後改名曰壽山。宋徽宗築奇峯怪石。古木異卉。亭榭池館。均極一時之勝。後爲金兵所毀。元時重修之。不能復其舊觀。今花木枯謝。惟怪石尙存。

## 一一 鄭州

鄭州舊屬開封。後升爲直隸州。今改鄭縣。在開封之西。地勢西扼虎牢。北枕黃河。京索二水下流。合爲賈魯河。城瀕東京水西岸。當京漢汴洛兩鐵路之中道。現議設陸路商埠。

### 蓼子峪

蓼子峪在汜水縣西十二里。卽成臯關口。南迫峭壁。北通大河。以界鞏洛。極爲陡險。

### 黃河鐵橋

鐵橋在滎澤縣北。橫臥黃河上。長九里。京漢火車自此過橋。東北達於京師。

工程奇巧。殊爲罕見。

### 太公亭

太公亭在河陰縣東北。亭前有高壇。卽項羽坐太公俎上處。今名項羽堆。亦稱太公俎。彭城之役。項羽大破漢軍。高祖僅以身免。其父太公爲楚軍所獲。及相拒於廣武。項羽因軍糧缺少。乃爲高俎。置太公於其上。告漢王曰。今不急下。吾烹太公。王曰。吾與若俱北面受命懷王。約爲兄弟。吾翁卽若翁。必欲烹而翁。幸分我一杯羹。項羽大怒。欲殺太公。項伯曰。爲天下者不顧家。殺之無益。祇益禍耳。羽從之。太公乃獲免。

### 虹橋

虹橋在汜水縣西北一里。長百尺。稍作弓形。明石玠詩。雨後鱗光橫巨岸。月明龍影浸寒波。紀其實也。

### 三 歸德

歸德在開封府東南。周封微子啓於此。國號宋。戰國時齊楚魏三分其地。漢爲梁國。隋置宋州。唐改爲睢陽郡。五代唐置歸德軍。金改爲府。今廢府爲歸德縣。卽前商邱縣治。地勢坦平。爲江淮入洛之通路。

### 隱山

隱山在鹿邑縣東十三里。峯巒起伏有勢。望之常有雲氣舒布。相傳爲五代時陳搏煉丹處。

### 漆園

漆園在歸德縣東北小蒙城內。戰國時莊周曾居此。莊周爲漆園吏。嘗夢化蝴蝶。栩栩然不知周也。俄而覺。則遽遽然周也。不知周之夢蝶。蝶之夢周也。是謂物化。其忘身形外類如此。

### 文雅臺

文雅臺在歸德縣東。世傳孔子適宋。與弟子習禮大樹下。卽此處。梁孝王時。

鄒枚相如之徒。多游吟其間。

#### 五老堂

五老堂在歸德縣城內。宋慶歷間。少師杜衍。侍郎王渙。司農卿畢世長。郎中朱貫。馮平。致仕里居。年俱八十餘歲。引用香山九老故事。作一堂。名曰五老。結社賦詩。以娛暮景。

#### 四 陳州

陳州居潁水之冲。積地。平阿無隘。水陸交通。上古庖犧氏都此。周封舜。後爲陳國。戰國時楚滅陳。頃襄王自郢遷都之。秦末。陳勝自立於此。唐置陳縣。屬淮陽。後周改爲陳州。清雍正十二年。升爲府。在開封府南。今廢府爲陳州縣。卽舊淮寧縣。

#### 雕陵岡

雕陵岡在扶溝縣西北二十里。岡上有雕陵亭。莊子遊乎雕陵之樊。覩一異

鵲卽此處。

### 東門池

東門池在陳州縣東門內。池水清潔。不生水草。中有故臺。卽詩陳風所謂東門之池。可以漚麻者是也。

### 厄臺

厄臺在陳州縣南一里許。卽孔子在陳絕糧處。臺爲後人所築。明嘉靖間。改曰絃歌臺。昔孔子厄於陳蔡之間。途中絕糧。召子路。問曰。詩云。匪兕匪虎。率彼曠野。吾道非耶。何爲至於此。子路曰。意者吾未仁耶。人之不我信也。吾未知耶。人之不我行也。孔子曰。由。使仁者而必信。安有伯夷叔齊。使知者而必行。安有王子比干。子貢曰。夫子之道至大。故天下莫能容。夫子盍少貶焉。孔子曰。賜。良農能稼而不能爲穡。良工能巧而不能爲順。顏回曰。夫子之道至大。故天下莫能容。雖然。不容何病。不容然後見君子。孔子欣然笑曰。有是哉。

絕糧七日。孔子與諸弟子愈慷慨講誦。絃歌不衰。明日免於厄。

### 子由亭

子由亭在陳州縣城內西北隅柳湖中。亭外徧植花柳。境絕幽靜。宋蘇子由讀書於此。

## 五 許州

許州在開封府南。周爲許國。漢置許縣。東漢末。獻帝遷都於此。曹魏改爲許昌縣。後周置許州。明隸開封府。清雍正二年。升爲直隸州。地勢坦平。汝潁二水斜貫之。舟車輻輳。城瀕石梁河。京漢鐵路通過之。

### 召陵岡

召陵岡在鄆城縣東三十五里。有召陵城。春秋僖公四年。楚屈完來盟於師。盟於召陵。卽此。

### 望嵩樓

望嵩樓在襄城縣城內。唐時建。登之可望嵩岳。劉禹錫送廖彥謀詩有句云。望嵩樓上忽相見。

### 尙書臺

尙書臺在臨潁縣東南四十里。爲漢馬融講授尙書之處。唐顯慶二年。高宗大閱於此。更名講武。馬融有俊才。受學摯恂。博通經籍。永茂間。拜校書郎。以忤鄧氏滯東觀十年。不得調。後爲河間王廡長史。召拜郎中。桓帝時。爲南郡太守。融才高博洽。爲世通儒。教養諸生。常有千數。校正史記訛謬。平生所著述甚富。坐高堂。施絳帳。前授生徒。後列女樂。以次相傳。鮮有入其室者。盧綰、鄭玄皆從學焉。

### 德星亭

德星亭在許州城西南。漢荀淑故宅。淑有子八人。並有才名。號稱八龍。以擬古之高陽氏。故亦稱高陽里。時同郡人陳實爲太邱長。嘗造荀門。使長子元

方將軍。季方持杖。孫孝先、長文坐車次。既至。淑使其子叔慈應門。慈明行酒。餘六龍下侍食。其孫文若年尚幼。坐之懷中。言語三日。德星爲之聚。因名荀居曰德星鄉。亭曰德星亭。稱羨於世。時人榮之。

## 六 汝寧

汝寧今改爲汝寧縣。卽故汝陽縣治也。西南有山。東北坦平。汝水淮水縱橫。灌溉其間。信陽縣南有武勝關。在石城山上。卽古冥阨。南通武漢。今鑿山開道。京漢鐵路由此通過。

### 玲瓏洞

玲瓏洞在遂平縣西七十里玲瓏山上。亦名窟呀山。山空洞百孔。風噓則鳴。故以玲瓏爲名。唐李觀與吳元濟大戰於此。五代時黃巢由潁蔡敗走。退保此山。

### 二龍鄉

二龍鄉在汝寧縣城內。亦名月量。爲後漢許邵故居。邵字子將。少峻名節。好覈論鄉黨人物。故汝南俗有月旦評焉。其兄虔。字子政。亦知名於時。謝子微見子將兄弟。歎曰。平輿之淵。有二龍焉。若子政者。有幹國之器。正色忠饗。則陳仲舉之匹。伐惡退不肖。有范孟博之風。由是汝南人名其鄉曰二龍。

### 相公園

相公園在信陽縣治後。宋茫純仁爲守時。創築此園。種花養竹。爲燕遊之所。後人因以名之。

### 平淮西碑

平淮西碑在汝寧城內裴度廟。唐韓愈撰。碑辭多敍裴度事。時入蔡擒吳元濟。李愬功第一。愬不平之。愬妻唐安公主女也。因訴於憲宗。謂碑辭不實。詔令磨去韓文。改命段文昌爲之。宋政治中。知州陳珣磨去段文。仍刻韓文於碑。其頌云。唐承天命。遂臣萬邦。孰居近土。襲盜以狂。往在元宗。崇極而圯。河

北悍驕。河南附起。四聖不宥。屢興師征。有不能尅。益戍以兵。夫耕不食。婦織無裳。輸之以車。爲卒賜糧。外多失朝。曠不嶽狩。百隸怠官。事忌其舊。帝時繼位。顧瞻咨嗟。惟汝文武。孰恤予家。旣斬吳蜀。旋取山東。魏將首義。亦州降從。淮蔡不順。自以爲強。提兵叫譴。欲事故常。始命討之。遂連姦鄰。陰遣刺客。來賊相臣。方戰未利。內驚京師。羣公上言。莫若惠來。帝爲不聞。與神爲謀。乃相同德。以訖天誅。乃敕顏胤。愬武古通。咸統於宏。各奏汝功。三方分攻。五萬其師。大軍北乘。厥數倍之。常兵時曲。軍士蠢蠢。旣翦陵雲。蔡卒大窘。勝之郢陵。郢城來降。自夏入秋。復屯相望。兵頓不厲。告功不時。帝哀征夫。命相往蠶。士飽而歌。馬騰於槽。試之新城。賊遇敗逃。盡抽其有。聚以防我。西師躍入。道無留者。頌頌蔡城。其疆千里。旣入而有。莫不順俟。帝有恩言。相度來宣。誅止其魁。釋其下人。蔡之卒夫。投甲呼舞。蔡之婦女。迎門笑語。蔡人告饑。船粟往哺。蔡人告寒。賜以緡布。始時蔡人。禁不往來。今相從戲。里門夜開。始時蔡人。進

戰退黜。今吁而起。左餐右粥。爲之擇人。以收餘憊。選吏賜牛。教而不稅。蔡人有言。始迷不知。今乃大覺。羞前之爲。蔡人有言。天子明聖。不順族誅。順保性命。汝不吾信。視此蔡方。孰爲不順。往斧其吭。凡叛有數。聲勢和倚。吾強不支。汝弱奚恃。其告而長。而父而兄。奔走偕來。同我太平。淮蔡爲亂。天子伐之。旣伐而饑。天下活之。始議伐蔡。鄉士莫隨。旣伐四年。小大並疑。不赦不疑。由天子明。凡此淮功。惟斷乃成。旣定淮蔡。四夷畢來。遂開明堂。坐以治之。

## 七 南陽

南陽在汝寧府西。今廢府爲南陽縣。治地勢多山。後倚伏牛。前履桐柏。左據方城。中扼三鵠路之險。丹江白河挾衆水。行於高地。南蔽荆襄。北通汝洛。乃中原衝要之地也。

## 蔓荆山

蔓荆山在新野縣北四十里。白河之澚。積沙高數丈。峯巒如堆雪。多產蔓荆。

因以爲名。

### 臥龍岡

臥龍岡在南陽縣西南七里。起自嵩山之南。綿亘數百里。至此截然而止。回旋盤繞。諸葛草廬在其中。時人以孔明爲臥龍。因名其岡。下平如掌。相傳卽孔明躬耕處。孔明本瑯琊陽都人。寓居於南陽。躬耕隴畝。好爲梁父吟。身長八尺。每自比於管仲樂毅。時人莫之許也。惟博陵崔州平及潁川徐元直與孔明友善。謂爲信然。時劉先主屯新野。徐元直往見之。先主器之。謂先主曰。諸葛孔明者。臥龍也。將軍豈願見之乎。先主曰。君與俱來。元直曰。此人可就見。不可屈致也。將軍宜枉駕顧之。由是先主遂詣孔明。凡三往。乃見。世稱爲三顧茅廬。

### 菊澗

菊澗在內鄉縣西北五十里。亦名菊潭。潭旁悉生甘菊。浸水成液。味極甘香。

飲之多壽。

### 樊重石室

樊重石室在唐縣南。漢樊重甚孝母。母畏雷。爲石室以避之。悉以文石爲階。今遺址尙存。

### 八 光州

光州在汝寧府東。春秋時爲弦黃蔣三國地。漢爲汝南江夏二郡地。曹魏析置弋陽郡。晉爲汝陰郡。唐置光州。清康熙二十年。升爲直隸州。今爲散州。州城瀕於潢水西北岸。南據大別水脈。淮水挾潢水與汝水合流其間。

### 浮光山

浮光山在光山縣北。卽弋陽山。山巖聳秀。俯映長淮。常有光耀如鏡。爲邑中之勝地。

### 橫溪山

橫溪山在商城縣西南。溪水橫流山中。故名。相傳爲武后梳洗崖。其相對處有照鏡崖。

### 石盤峯

石盤峯在光山縣南九十里。山勢盤旋險峻。其頂平整如石盤然。舊有寨柵。可屯千人。

### 玩花樓

玩花樓在息縣城內縣治西。舊傳爲息侯所築。一名藏春塢。花木掩映。爲士人遊玩之地。宋蘇軾詩云。朱閣前頭露井多。碧桃花下美人過。寒泉未必能勝此。奈有銀瓶素縷何。

## 九 河南

河南在開封府西。今廢府爲河南縣。卽故洛陽縣治也。東揖嵩高。南望三塗。西控嶂坂。北枕黃河。伊洛瀍澗四水。合流斜貫而入於河。四塞險固。故爲歷

代帝王之都焉。

### 北邙山

北邙山在河南縣城北。一名邙山。綿亘四百餘里。東漢諸陵及唐宋名臣墓。多在此。唐張籍詩云。洛陽北門北邙道。喪車磷磷入秋草。車前齊唱薤露歌。高墳新起白峨峨。山頭松柏半無主。地下白骨多於土。

### 嵩高山

嵩高山在登封縣北。卽中嶽。東曰太室。西曰少室。相去十七里。有三十六峯之勝。漢王玄高尚不仕。隱居山中。景帝累徵不出。因就其所居封侯。時有隱侯之名。後人稱其所住處爲王玄崖。唐盧鴻亦結廬於此。玄宗備禮徵召。拜諫議大夫。鴻固辭不就。詔許還山。賜隱居服官。營草堂以居之。李渤隱於南巖。元和初。以山人徵爲左拾遺。太室南麓有嵩陽書院。五代時建。宋至道年初。賜九經子史。儲藏其中。及景祐二年。建居五百楹。王曾奏置教官。賜今名。

及田一頃。小室西麓。有袁術固。下有公路澗。爲漢末袁術所鑿。內可容十萬衆。一夫守隘。萬人莫當。

### 達摩洞

達摩洞在登封縣西少林寺中。洞深黑莫測。相傳卽達摩面壁九年。修道成仙之處。

### 天津橋

天津橋在河南縣西南二十里。唐玄宗嘗於上陽宮。夜後。按新翻一曲。及正月十五夜。潛遊燈下。忽聞酒樓上有笛奏前夕新曲。密捕笛者詰之。自云其夕於天津橋玩月。聞宮中度曲。遂於橋柱上插譜記之。臣卽長安少年善笛者李暮也。玄宗遂留之宮中。宋邵康節與客散步天津橋畔。聞杜鵑聲。愀然不樂。曰。洛陽舊無杜鵑。今始至矣。客曰。何謂也。曰。天下將治。地氣自北而南。將亂。自南而北。今南方地氣至焉。禽鳥得氣之先者。必有所主。故知之。未幾

王安石等用事。專務變更。天下自此多事。康節之言果驗。

### 雲臺

雲臺在河南縣城東。爲漢明帝所築。永平三年。帝追感前世功臣。乃圖畫中興名將二十八人於南宮雲臺。以鄧禹爲首。次馬成、吳漢、王梁、賈復、陳俊、耿弇、杜茂、寇恂、傅俊、岑彭、堅、鱗、馮異、王霸、朱祐、任光、祭遵、李忠、景丹、萬修。蓋延、邳彤、姚期、劉植、耿純、臧宮、馬武、劉隆。又益以王常、李通、竇融、卓茂。合三十二人。馬援以椒房之親。獨不與焉。後人多議其非。按雲臺圖畫。皆中興佐命之臣。然其中竟有功業未著而得列名者。萬修、劉植輩是也。世徒以不入馬援。爲因椒房之親。然當時如鄧陽來歙。蓋忠捐軀。功績顯著。曾不得與王常、李通輩。並與增益之數。又豈皆以戚屬故耶。則雲臺之旌表。實有未足多者。

### 玉女臺

玉女臺在登封縣北嵩高山上。臺下有玉女擣帛石。每歲至立秋前一日。中

夜常聞杵聲。

金谷園

金谷園在河南縣西北。晉石崇別業。園中有清涼臺。卽其愛妾綠珠墜樓殉節處。崇字季倫。小字齊奴。置金谷別墅於河陽。一名梓澤。嘗與貴戚王愷楊琇之徒。奢侈相尚。春遊踏青。作錦障五十里。王愷得珊瑚樹高二尺。示崇。崇以鐵如意擊碎之。愷惋然。崇曰。不必怏怏。使左右取三四尺高者六七株。以償愷。愷恍然自失。崇居別墅中。蓄姬妾十數人。嘗屑沈香塵。布象牙牀。使一一踐之。無跡者賜珍珠百琲。有跡者節飲食。閨中戲曰。爾非細腰輕軀。那得百琲珍珠。有姬曰綠珠。美而豔。善吹笛。崇嬖幸逾恆。無一刻不使之侍。右孫秀聞其美。使人求之。崇盡出其婢妾數十人。使之自擇。使者曰。受命索綠珠。崇曰。綠珠我所愛。不可得也。使者報命。秀大怒。遂矯詔收崇。時崇方與姬妾輩宴飲樓中。綠珠並坐於上。捕者圍登。崇被逮。綠珠自知不免。卽墜樓而

死。

### 綠野堂

綠野堂在河南縣南十里。唐裴度故居。度因闢豎威。力請罷職。乃治第東都集賢里。沼石林叢。岑繚幽勝。跨午橋作別墅。有燠館涼臺風亭水榭諸勝。號曰綠野堂。度常野服蕭散。與白居易劉禹錫把酒著文。晝夜相歡。不問人間事。自號曲江公。後宋張齊賢致政時。得其宅居之。有詩云。午橋今得晉公廬。水竹煙花興有餘。

### 十 陝州

陝州爲周時西虢。卽周召二公分陝之地。春秋時屬晉。晉分入於韓。秦屬三川郡。漢置陝縣。後魏置陝州。其地西屏關中。東維河洛。履嶠坂而戴華山。負大河而阻函谷。賈誼所謂嶠函之固也。

### 熊耳山

熊耳山在盧氏縣西南五十里。山勢峻險。道路難行。兩峯齊秀。相並如熊耳。故以爲名。

### 函谷關

函谷關在靈寶縣南十里。卽戰國時秦故關也。關城在谷中。深險如函。崎嶇難行。故名。昔齊孟嘗君自秦亡歸。夜半至函谷關。關法雞鳴而出。客孟嘗君恐追者至。從客中有能爲雞鳴者。命試之。羣雞齊鳴。乃得出。

### 望氣亭

望氣亭在靈寶縣南。亦名尹喜臺。卽尹喜故宅。老子騎青牛入關。尹喜望見紫氣知之。卽往迎之。老子果至。授喜以煉氣吐納之道。三宮正一之法。及道德經五千言。信宿乃去。

### 魏野草堂

魏野草堂在陝州城東三里。多竹樹泉石之勝。額曰樂天洞。前爲草堂。野嘗

彈琴其中。野字仲先。性灑落閒散。不拘禮數。客有過訪者。皆白衣紗幅。見之。每出跨白驢。蕭灑自得。自號草堂居士。好彈琴賦詩。其詩有棋進莫饒。客琴生却問兒。松風輕賜扇。石井勝頰冰。洗硯魚吞墨。烹茶鶴避煙等句。宋太宗祀汾陰時。召之。辭疾不至。帝命工圖其所居觀之。稱羨不已。一日。方教鶴舞。忽報中使至。乃抱琴踰垣而走。嘗以詩贊王文正公。且云。從前輔相皆頻出。獨在中書十五秋。秦嶽汾陰俱禮畢。這回好伴赤松游。寇萊公鎮洛時。三邀不至。遂寫刺訪之。野葛巾布袍。降階長揖。議論騷雅。相得甚懽。嘗以酒詩往還。萊公用碧紗籠。魏詩時久塵積。座中有官妓以袖拂之。野賦詩云。若得時將紅袖拂。也應勝着碧紗籠。後有致萊公詩云。好去上天辭將相。却來平地作神仙。萊公深然之。

## 十一 汝州

汝州在南陽府北。春秋時。鄭楚二國地。漢置梁州。晉屬河南郡。東魏置北荊

州。隋置汝州。南憑伏牛。北負嵩高。據汝水上游。以三鵠之路。通於宛鄧。山川盤紆。原隰沃衍。

### 洗耳河

洗耳河在汝州城西門外。源出登封縣箕山。河上有許由廟。相傳許由嘗洗耳於此。古時許由高尙隱居。據義履方。堯以天下讓許由曰。日其出矣。而燬火未息。其於光也。不亦難乎。時雨降矣。而猶浸灌。其於澤也。不亦勞乎。夫子立而天下治。我猶尸之。請致天下。由以告巢父。父曰。何不隱汝形。藏汝光。處高崖窮谷。誰能見子。子浮游世間。取名譽。非吾友也。由悵然。乃答曰。子治天下。天下已治。而我猶代乎。鷓鴣巢於深林。不過一枝。鼪鼠飲河。不過滿腹。歸休乎。無所用天下爲。遂至河濱洗其耳。巢父牽犢過之。不飲而去。

### 太史湖

太史湖在汝州城外。宋太守王素所濬。爲一郡之勝。春夏之際。邑中人士泛

舟遊於其中。

### 流杯池

流杯池在汝州南三十里。唐武后嘗與從臣姚元崇、蘇頌、畢曜等於此遊宴賦詩。舊有碑石尙存。

### 修禊亭

修禊亭在魯山縣城內。唐歐陽詹爲縣令時嘗於三月三日召集僚吏宴飲修禊於此。

## 十一 衛輝

衛輝西倚太行。南阻黃河。有淇衛二水交流其間。故西北多山地。東南多平原。地在開封府之北。今廢府爲衛輝縣。卽故汲縣治也。其城瀕於衛河南岸。京漢道清兩鐵路經之。

### 磻溪

礮溪在衛輝縣西北。有石夾水。飛湍濬急。相傳太公嘗釣於此。溪上舊有太公廟焉。

### 朝歌故城

朝歌故城在濬縣西五十里。紂所都城。內有摘星樓。卽紂與妲己觀斲朝涉之脛處。

### 青陵臺

青陵臺在封邱縣。韓憑爲宋康王舍人。其妻何氏美而賢。王聞而涎之。乃下舍人於獄。築青陵臺以居何氏。何氏作烏鵲歌。以見其志。遂自縊而死。舍人亦瘦死於獄中。

### 嘯臺

嘯臺在輝縣西北七里蘇門山上。相傳三國時孫登隱居於此。嘗登臺長嘯。其聲若鸞鳳之鳴。自號蘇門生。晉阮籍少時遊蘇門山。山有隱者。莫知其姓。

名籍從之。與談太古無爲之道。及論五帝三王之義。隱者曾不經聽。籍乃對之長嘯。清韻響亮。隱者道爾而笑。籍既降。隱者亦嘯。聲若鳳鳴。蓋隱者卽登也。

### 七賢祠

七賢祠在輝縣西南六十里。祠之左右。筠篁列植。晉時阮籍、稽康、山濤、王戎、向秀、劉伶、阮咸同居山陽。結自得之遊。時號爲竹林七賢。向子期所謂山陽舊居也。後人立祠於其處。

### 畫舫齋

畫舫齋在滑縣城內。宋歐陽修建。蔡襄書額。齋廣一室。其深七室。處其中者。如入舟中。

## 十三 懷慶

懷慶在衛輝府之西。今廢府爲懷慶縣。卽故河內縣治也。北負太行王屋。南

阻黃河。臨孟津而控虎牢。丹沁二水交流其間。京漢鐵路貫其東。道清鐵路經其北。商賈咸集於此。

### 太行山

太行山在懷慶縣北。山勢綿亘數千里。其間峯谷巖洞。景物萬狀。因地立名。總稱太行。東有獅子峯。怪石奇特。西有紫金壇。壇祠魏夫人。宋碑尙存。北有羊腸坂。幽僻屈曲。林木清秀。南有盤谷。唐李愿隱居於此。韓愈送李愿歸盤谷序云。太行之陽有盤谷。盤谷之間。泉甘而土肥。草木叢茂。居民鮮少。或曰。謂其環兩山之間。故曰盤。或曰。是谷也。宅幽而勢阻。隱者之所盤旋。友人李愿居之。與之酒而爲之歌。曰。盤之中。維子之宮。盤之土。維子之稼。盤之泉。可濯。可沿。盤之阻。誰爭子所。窈而深。廓其有容。繚而曲。如往而復。嗟盤之樂兮。樂且無央。虎豹遠跡兮。蛟龍遁藏。鬼神守護兮。呵禁不祥。飲且食兮。壽而康。無不足兮。奚所望。膏吾車兮。秣吾馬。從子於盤兮。終吾生以徜徉。

## 孟津

孟津在孟縣南十八里。周武王率師代紂。與八百諸侯會盟於此。故孟津亦名盟津。

## 盧仝別墅

盧仝別墅在濟源縣西北二十里。墅內有烹茶館。盧仝詩云。買得一片田。濟源花洞前。

## 聶政墓

聶政墓在濟源縣南深井里。俗呼爲刺客墓。其地本故軹城。爲聶政之故里。卽葬於此。戰國時。濮陽嚴仲子與韓相俠累有隙。欲報之。聞政勇敢。乃奉黃金百鎰。爲政母壽。政以母在不許。及母死。獨行仗劍。刺殺俠累以報嚴。因自披面抉目而死。暴尸於市。人莫之識。其姊聞而往哭之。曰。是軹深井里聶政也。妾奈何畏沒身之誅。而沒賢弟之名。遂亦自刎於尸旁。

## 十四 彰德

彰德西倚太行山脈。東面平壤。清濁二漳合流橫貫其北。衛水挾淇洹二水經流其東。其城瀕於萬金渠北岸。京漢鐵路通過之。在衛輝府北。今廢府爲彰德縣。卽故安陽縣治。

### 韓陵山

韓陵山在彰德縣東北十七里。南北朝魏普泰二年。高歡敗爾朱兆於此。創建定國寺。立石於寺中。以旋功伐。命溫子昇爲文刻之。梁庾信使北過此。讀其文。愛其藻麗。手自錄之。及南歸。與人論北朝人物。嘗曰。惟韓陵一片石堪共語耳。

### 隆慮山

隆慮山在林縣西二十里。一名林慮。南連太行。北接恒嶽。山中泉石奇秀。林木叢幽。

### 三雀臺

三雀臺在臨漳縣西南。魏建安十五年。作銅雀臺。晉咸康中。石虎徙鄴。略事修飾。改銅雀臺。名曰鸛雀臺。升中元年。慕容雋都鄴。復作銅雀臺。故後人謂之三雀臺。

### 羸里

羸里在湯陰縣北。一名牖城。昔紂納崇侯虎之言。囚西伯於此。乃演易作明夷。用明否泰終始之義。

### 浣衣里

浣衣里在湯陰縣西南。晉惠帝師敗湯陰。百宮皆走。獨侍中稽紹。端冕帝側。以身捍主。遂至見害。血濺御衣。及事甯。左右欲浣之。帝曰。此嵇侍中血。勿去也。詔葬縣南。因名其里爲浣衣里。

### 畫錦堂

畫錦堂在彰德縣城內東南隅。宋韓琦以宰相判鄉郡。建築居第。名其堂曰畫錦。歐陽修作記。蔡襄書石。

### 避暑宮

避暑宮在林縣西北黃華山插天峯下。宮殿緣崖構結。景趣幽絕。相傳東魏高歡築以避暑。

### 逍遙樓

逍遙樓在臨漳縣西九華宮內。宮爲石虎所築。其北有樓。石虎登其上。極目戲遊。謂羣臣曰。此真逍遙之奇觀也。因以名樓曰逍遙。